

Fundacion Herencia Historico di Aruba den cooperacion cu UNOCA



Dialuna 6 November 2006 Lucia Kelly y Olinda Rasmijn di Fundacion Herencia Historico di Aruba a haci entrega di un programa audio-visual "Nos Herencia Historico: e periodo Indjan" na Lupita Gil di UNOCA. E fundacion a logra realiza e proyecto aki cu yudanza financiero di UNOCA. E programa ta trata tres topico: 1. Artefactonan indjan, 2. Santananan Indjan, 3. Number di lugarnan y pinturanan Indjan. Meta principal di e documentario nan ta pa muestra nos comunidad kico tin presente ainda di nos historia y di e manera aki siña of sera conoci di nobo cu Aruba su historia.

E fundacion a presenta e documentario nan aki den diferente bario aki na Aruba y a acerca Biblioteca Nacional

Aruba pa presenta nan un of dos bes mas. UNOCA lo bai trata di pone e programa aki ariba nan website www.unocaaruba.com pa e informacion alcanza mas hende den comunidad.

Proyecto "NOS HERENCIA HISTORICO: periodo indjan"

Fundacion Herencia Historico di Aruba a wordo funda 11 di April 2006.

Nos fundacion ta consisti di: Lucia Kelly (presidente), Olinda Rasmijn (secretaria) y Susan de Lange (tesorero). E fundacion a cuminsa den forma di un comision mas o menos 4 aña pasa, reunionendo den tempo liber tur siman.

E base di formacion di e comision tabata: interes mutuo pa historia y desaroyo

general di Aruba. Trahando den archivo, biblioteca, riba e tereno socio-cultural of den comunidad en general estimulando cuidu di y amor pa naturaleza ta topa cu necesidad y interes pa informacion tocante Aruba su historia. Esaki tabata e estimulacion pa nos traha y purba realiza e proyecto. Nos a tuma casi 2 aña pa lesa, papia y discuti cu otro pa yega na un meta concreto pa e proyecto. Nos mes a busca informacion y lesa, tambe nos a acerca profesional pa haña mas informacion y tambe nos mes a sali haci investigacion.

Cu proyecto aki nos kier contribui cu engrandecimento di conocimiento general di Aruba su historia mustando rastro y herencia di nos pasado den un forma diferente, na un

manera enfocando riba mas riba imagen cu riba teksto.

Dia den dia afo nos ta core rond di Aruba y pasa banda di resto y rastro nan di nos historia sin nos sa cu e tabata parti di historia. Of si nos tabata sa mes, nos a lubida. Na mesun momento Aruba su comunidad ta den un desaroyo multicultural, cu personanan cu ta bibando cerca nos y cu no sa ainda suficiente di Aruba su historia y cu ta interesa pa haña sa mas.

Kico ta e mihor manera pa conta algo, enfoca riba algo? Pa nos ta e manera visual. Mustando, enfocando riba imagen di kico tin ainda presente di nos historia y nos kier probecha na mesun momento pa conta historia. P'e motibo aki nos a scoge pa traha un produccion audiovisual.

Augustus 2003 nos a entrega un peticion na UNOCA pa financiamiento di e proyecto 'Nos herencia historico': un proyecto audiovisual cu e meta principal di muestra nos comunidad kico ainda tin presente di nos historia, cu bo por mira of mishi uno, pero alaves siña of sera conoci din obo cu Aruba su historia

E proyecto 'nos herencia historico' ta consisti di 31 topico relata na historia di Aruba. Y e periodo cu e proyecto ta cubri ta for di pre-historia ten a yega di Lago aki na Aruba. E periodo cubri ta dividi den 3 parti: 1. Periodo

Indjan

2. Periodo

Spaño

3. Periodo

Hulandes

Nos a haña financiamiento di UNOCA pa realiza e prome parti di nos proyecto, esta e periodo indjan. E programa aki ta consisti di 3 parti: 1. artefactonan indjan

2. santana indjan

3. number y lugar indjan

Grupo meta di e proyecto aki ta general.

Nos no kier pretende di ta completo, nos kier logra cu esnan cu wak e programa bira caweta y kier haña sa mas, bishitando Biblioteca of Archivo of Museo Arqueologico pa mas informacion. Of por ta haña interes pa produci un otro programa audiovisual bayendo mas den detayes.

E programanan tin duracion di 20 pa 25 minuut y ta den nos idioma Papiamentu. Tambe lo tin substituto na Ingles.

Nos a logra haña cooperacion di profesionalnan pa realiza e programa:

Shirley Angela-Eisden pa skirbi e script y Rebecca Roos Productions N.V. pa filmacion y production. Fuera di e 2 persona aki nos a ricibi ayudo di drs. Raymundo Dijkhoff, arqueologo.